

中華文史叢書之四十五
清、道光十三年刊本影印
王有立主編

楊忠烈公集

(二)

明、楊連撰

華文書局股份有限公司印行

楊忠烈公文集卷之五

寄夏父臺

恭惟老父臺覺在民先仁為己任應山彈丸鄙邑也無足辱大君子君臨一旦生成藉鼎則山水實式靈之耳聞報之日士民欣欣盤相告曰名邦鉅公造化庶其福我及敝同年甌寧兄書來頌述聖人之清天下為任襟期風矩未可一世蓋仕以行其所蘊要於樹立故不擇官擇地耳父母子弟益復盤舞若狂吾曹疾苦有告矣饑寒有訴矣有教我子弟者矣而虎冠鼠憑之輩亦各

目相視而神若沮則應山生靈數十年來何修而得此
再造哉當今征繕之日民間騷窘迫之狀亦既耳聞
而目擊矣安輯柔來惟守令最親惠此四方以奠京師
我輩社稷之功亦於是為大而此無窮福力亦實惟吾
一念自明造也若得以甌寧兄之誦述化為天下文官
心豈虞世界不擊壤某既為桑梓慶更為天下治平有
名世慶矣龍門未遠樞衣心切茲因公役之便肅此代
候一布子民喜忭企延衷私惟台照在引領卿雲如何
得即披覲也

與成密字宮坊

憶去年涂月雪朝老年兄共二三兄弟存弟荒寺也言
笑追隨若昨日事忽是歲再除端再履老年兄調元協
泰與日俱新聖天子啟祥肇祚伊初大人開讀進退之
間格心事業亦定有與春俱長者弟輩田野之人何勝
為國家引領手額廢間以來邸報除書俱未入目或從
人間聞外侮內憂竊意明主可為堯舜啟沃輔弼當自
有人啟聖興邦天亦或當有意無事山野杞憂惟日從
一二方外曉人講世外話問壺中秘徐圖為雲水瓢笠

之游無復夢到長安意趣甚爽適所不能忘情者惟同
門知契兄弟雲樹月梁猶作有情癡耳

與李湘洲宗伯


一別台臺即是二年來也去歲紀綱過縣得接手教喜如對面而滿懷欲言終不得達屢圖一候而應門無可遣者又病與冗會歉缺豈只沾沾寒暄哉年來長安日變漸至憂在內廷此其禍不得不深恨於小人之害正以害國也庚申秋冬之間皇上精神與外臣相信相一中璫猶有可用者假令深心遠識得安都門南昌漢陽可與為善朝夕晤語之間令其大頭腦處有清正幹濟之力聖主之意向一端羣工之腴理一清上下和協定

不至如今大溷大亂也此非誕語也即如前歲中秋之事實社稷安危之一關也無手教半夜一言弟未必敢與左道長明目張膽要大老於宮門半日默遣去禍本九月初一宮未必能移而垂簾稱制之事成矣猶記台臺之言曰此實安危所係但此事在未然我爭之而成未必有名一爭之而不成定有烈禍然我儕臣子要與有濟國家名與禍都不必計嗟夫世有此蓋臣之心哉惟台臺一去二三老者未必無正氣好心而不學無術識差一著膽怯一步於微漸處眼慢於吃緊處著鬆無

相近相信人點破提醒事故一壞不可收拾小人反得
倒之以為用故曰深心先識君子一去國門而禍已兆
矣為人用之小人朝夷暮跖可勝道哉已矣無復言矣
年來老成力量周冢宰猶有可觀而一言去之如逐小
兒百方構害經畧者計似已定小人走乳保徑路已成
經畧當無安理獨恨邊事兵刃未集豈容輕試百方慎
重此不易之論而彼人畢竟都與相左何哉周熊俱逐
何害即楚人盡逐亦是無妨恐汪劉之禍漸漸中於社
稷耳小人是何心腸當時楚人輕信人相附而畢竟殺

楚人者盡相附之人線提也特往時殺人不見刀今乃
自出手耳已矣無復言矣川中事今未知如何大都變
初聞時謀在未合機在猶疑而援邊兵可借與附近土
司可合有能於王文成夜趨吉安項襄毅直薄賊巢事
未必不倉卒有成乃使聞變之後獨一秦婦人鼓義相
逼已見漢無男子而又不見隨有人鼓其後都可嘆也
今黔蜀二撫未知如何而張涵月在磁州捕逃卒十六
人立斬以徇差有可觀未知此番動定不至失著否台
臺視此想不能無漆園女之憂也看來大勢須是天祚

社稷必是司馬相而後太平可冀耳日者條風布煖君子道與時亨花間彩服大椿日煖是時三公不易一刻某遠在深山無能樞趨展望亦生平缺事也時因羽便肅此申候不盡之衷筆舌終說不十一也



寄張學海

某廢棄以來屢蒙軒車不避險遠顧我印堂古人千里
命駕雪夜泛舟未足多稱至草蔬同飯款語連床長者
亦不我督過則客之為郭有道耳原當登堂謁謝并布
積私而冗與嬾會似花柳前川無緣領眺倍得領畧妙
旨兼得借觀武湖中生洲勝槩數舍之地若隔弱水蓬
萊楊生俗趣在胸填塞且亦報施之謂何慚且汗淫淫
下也某北上興猶闌珊不出為畏避出又恐積負乘真
有左難右難者翁臺更何以策之引領明德厚誼神戀

戀如有結也豈但尋常交遊之情與哉令郎想董園不
窺也從來天不負苦心人更不負世德人如為視拳拳
也

與荊州太守

當在琴川獲侍顏色瞻韓御李一日千秋更辱肝膽傾披獎期過重感切至今如在也所恨風萍聚對常難而魚素緘題亦復慵缺是為罪歎耳每念台臺勁骨遠神鴻威洞識的是支扶社稷名臣出守三韓正色率屬民既溫焉如春而當征檄如雨之時獨堅持愛惜根本之論存卹首善首累之民畢竟是安攘至議如此骨力神識寧啻超超羣倫仁人之言三韓至今受用無窮也民有帖安而無虞擇走社稷之功亦於是為大此吾黨有

心人共有同論也三湘有幸借鼎旬宣即今赤白之九
無有竊弄而兵餉疊加之餘中澤鴈安荊州從來多事
之地當今有事之時一人無虞於南顧則綏靖消弭有
受之者矣每為縣官手額若廢閒之人得以安枕深山
其戴荷怙冒又不必言矣

寄路吏部

憶乙卯夏在京賞瑞蓮大飽卽厨諸麪食時竟是八年
矣無論世有變遷人情幻化大喪相繼内外交慮正我
輩杞憂日也所恃整頓乾坤再襄中興者惟用人是賴
年丈當今治平名世也前總銓衡計夾袋材館收儲人
才衆矣確矣此番推舉内外大小各得其人於以毗輔
一人收拾羣策廟堂之精采一振而太平之氣象自新
弟伏在家園何勝為朝廷手額不但在同籍之藉色分
光已耳至於弟附在梧垣言非其職任曾以攻奸璫停

后封受先帝之特知謬欲為少主杜牝晨之索拂二三
大臣跪請託婦人之議異己猜嫌居功議起祇有一逃
免開爭端即終身山林可也不虞閏升謬及弟擬冬盡
春初還圖一疏乞休倘得所請不失善息成前年拂衣
初心耳年兄當有以力贊之也如何